



Broj: UP-I-KSI-09-20/22

Datum: 14.04.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba navedenog Zakona od strane A.D. iz Brčkog, ulica [REDACTED], broj [REDACTED], poslanika u Skupštini Brčko distrikta Bosne i Hercegovine, kao nosioca javne funkcije, na 52. sjednici, održanoj dana 14.04.2023. godine, donijela je

## RJEŠENJE

1. UTVRĐUJE SE da je A.D. iz Brčkog, ulica [REDACTED], broj [REDACTED], poslanik u Skupštini Brčko distrikta Bosne i Hercegovine, kao nosilac javne funkcije postupio protivno članu 19. stav (1) i stav (2), te članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da dana 20.01.2022. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II Komisiji za odlučivanje o sukobu interesa nije prijavio svoju nepokretnu imovinu i nepokretnu imovinu bračnog/vanbračnog druga kao i svoju pokretnu imovinu i pokretnu imovinu bračnog/vanbračnog druga vrijednosti veće od 5.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, A.D. se shodno članu 39. stav (1) tačka b) navedenog Zakona izriče novčana kazna, i to obustavom dijela isplate neto mjesečne plate, odnosno naknade koju nosilac javne funkcije prima za obavljanje javne funkcije u iznosu od 10% (deset posto) neto plate, odnosno naknade.

## Obrazloženje

Komisija za odlučivanje o sukobu interesa je po službenoj dužnosti zaključkom, broj: UP-I-KSI-09-20/22 od 09.12.2022. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije A.D., poslanika u Skupštini Brčko distrikta Bosne i Hercegovine, iz Brčkog, ulica [REDACTED], broj [REDACTED], jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-

Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 20.01.2022. godine Komisiji za odlučivanje o sukobu interesa i podataka prikupljenih od nadležnih organa i institucija o nekretninama nosioca javne funkcije i nekretninama bračnog/vanbračnog druga nosioca javne funkcije kao i podataka o pokretnim stvarima nosioca javne funkcije i pokretnim stvarima bračnog/vanbračnog druga nosioca javne funkcije vrijednosti veće od 5.000,00 KM, jer nosilac javne funkcije nije prijavio, odnosno u Izvještaj o imovinskom stanju nije tačno i potpuno unio podatke o nepokretnoj imovini, tačnije nekretninu označenu kao parcela, broj: [REDACTED] ([REDACTED]), „[REDACTED]“, u površini od 18m<sup>2</sup>, upisanu u zk. uložak, broj: [REDACTED] ([REDACTED]) sa upisanim pravom građenja na A.D. sa dijelom od 1/1; nekretnina označena kao parcela, broj: [REDACTED] ([REDACTED]), „EŠ“, [REDACTED] sprat, jednosoban stan u površini od 46 m<sup>2</sup>, upisana u etažni uložak, broj: [REDACTED], etažni poduložak, broj: [REDACTED], glavni uložak, broj: [REDACTED] za k.o. Brčko 1, vlasništvo A.D. sa dijelom od 1/1 i nekretnina označena kao parcela, broj: [REDACTED] ([REDACTED]), „[REDACTED]“, livada 3. klase u površini od 428 m<sup>2</sup>, upisana u zk. uložak, broj: [REDACTED] ([REDACTED]), za k.o. Brčko 3, sa upisanim pravom građenja na A.O. sa dijelom od ½, bračni/vanbračni drug nosioca javne funkcije.

Osim toga, uočena je nesaglasnost između prijavljene imovine u Izvještaju o imovinskom stanju-Aneks II i podataka dobijenih od strane Odjeljenja za javni registar Vlade Brčko distrikta Bosne i Hercegovine u dijelu da nije u Izvještaj o imovinskom stanju unesen automobil marke BMW, tip: X70, registarske oznake: [REDACTED], godina proizvodnje 2008, vlasništvo A.D. i automobil marke BMW, tip 3L, registarske oznake: [REDACTED], godina proizvodnje 2010, vlasništvo A.O., bračni/vanbračni drug nosioca javne funkcije.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-20/22 od 09.12.2022. godine, zaprimljen 28.12.2022. godine, A.D., poslanik u Skupštini Brčko distrikta Bosne i Hercegovine, kao nosilac javne funkcije dana 11.01.2023. godine je dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da je Komisija pokrenula postupak jer u Izvještaju o imovinskom stanju nije prijavio svoje nekretnine i nekretnine bračnog/vanbračnog druga, i to: nekretnina označena kao parcela, broj: [REDACTED]-[REDACTED], „[REDACTED]“, upisana u zk. uložak, broj: [REDACTED] ([REDACTED]) i nekretnina označena kao parcela, broj: [REDACTED] ([REDACTED]), „EŠ“, [REDACTED] sprat, jednosoban stan, glavni uložak, broj: [REDACTED] za k.o. Brčko 1, a radi se o parcelama koje je naslijedio nakon očeve smrti, a kako je ostavinski postupak okončan puno poslije podnošenja Izvještaja o imovinskom stanju-Aneks II, navedene nekretnine će unijeti u Izvještaj za 2022. godinu, a zbog zdravstvenog stanja nije bio u mogućnosti isto obaviti odmah po okončanju ostavinskog postupka.

U vezi s neprijavljenim pokretnim stvarima vrijednosti veće od 5.000,00 KM u Izvještaju o imovinskom stanju-Aneks II, naveo je da automobil marke BMW, tip: x70, registarske oznake: [REDACTED], vlasništvo A.D., nije u njegovom vlasništvu od 2014. godine, jer je isto prodato M.M. iz Čelića, za šta je kao dokaz dostavio i Ugovor o komisionoj prodaji zaključen dana 12.09.2014. godine, dok u vezi sa neprijavljenim automobilom marke BMW, tip: 3L, registarske oznake: [REDACTED], vlasništvo A.O., to vozilo nije prijavio zbog komplikovanog odnosa sa A. i zbog svog lošeg zdravstvenog stanja.

Nadalje, u vezi se neprijavljenom nekretninom označenom kao parcela, broj: [REDACTED] ([REDACTED]), „[REDACTED]“, livada 3. klase, upisana u zk. uložak broj: [REDACTED] ([REDACTED]), za k.o. Brčko 3 sa upisanim pravom građenja na A.O. sa dijelom od ½, za istu je, prilikom podnošenja Izvještaja o imovinskom stanju dana 20.01.2022. godine bio ubjeđen da je ista prodata.

A.D. obnaša funkciju poslanika u Skupštini Brčko distrikta Bosne i Hercegovine, na osnovu Uvjerenja Centralne izborne komisije Bosne i Hercegovine, broj: 06-1-07-01-2103-2-3231/20 od 15.12.2022. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da A.D. nije u Izvještaju o imovinskom stanju podnesenom 12.01.2022. godine Komisiji za odlučivanje o sukobu interesa unio podatke o vlasništvu nad navedenim nekretninama kao i podatke o vlasništvu bračnog/vanbračnog druga nosioca javne funkcije nad gore navedenim nekretninama i pokretninama, čime je postupio protivno odredbi člana 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

U Izvještaj o imovinskom stanju-Aneks II, A.D. je u rubriku „Podaci o bračnom/vanbračnom drugu“ upisao A.O., te je zbog toga obaveza nosioca javne funkcije unijeti podatke o imovini svog bračnog/vanbračnog druga u Izvještaj o imovinskom stanju.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve otežavajuće i olakšavajuće okolnosti kako bi izrečena sankcija odgovarala učinjenoj povredi Zakona. Komisija je cijenila kao otežavajuće okolnosti činjenicu da je A.D. propustio unijeti podatke o nekretninama u vlasništvu sa dijelom od 1/1 i nekretninu u vlasništvu bračnog/vanbračnog druga nosioca javne funkcije sa dijelom od 1/2, te podatke o pokretnim stvarima vrijednosti veće od 5.000,00 KM. A.D. kao nosilac javne funkcije bio je dužan prijaviti dopunu Izvještaja u vezi s gore navedenim nekretninama, koje je stekao po osnovu nasljedstva, odnosno rješenja o nasljeđivanju, broj: UPP-106/2022 od 20.06.2022. godine-broj sudskog spisa: 90 0 O 146901 22 O, shodno odredbi člana 21. stav (1) tačka b. Zakona o sprečavanju sukoba interesa u institucijama Brčko distrikta Bosne i Hercegovine.

U odnosu na navode iz Izjašnjenja da nije mogao unijeti u Izvještaj o imovinskom stanju-Aneks II podatke o vlasništvu svog bračnog/vanbračnog druga A.O. nad pokretnim stvarima vrijednosti veće od 5.000,00 KM i nekretninom, pravdajući to njihovim međusobnim lošim odnosima, za Komisiju je to u ovom slučaju potpuno irelevantno, jer je shodno zakonskim

odredbama nosilac javne funkcije imao obavezu unijeti podatke o pokretnoj i nepokretnoj imovini svog bračnog/vanbračnog druga, pa samim tim i uložiti sve napore i mehanizme kako bi podatke blagovremeno prikupio i prijavio. Komisija, kao još jednu od otežavajućih okolnosti u konkretnom slučaju cijeni činjenicu da A.D. obnaša funkciju poslanika u Skupštini Brčko distrikta Bosne i Hercegovine, te je samim tim bio upoznat, odnosno morao biti upoznat sa pomenutim Zakonom, jer se na sjednicama Skupštine Brčko distrikta Bosne i Hercegovine, a na kojima i sam prisustvuje upravo raspravljalo o načinu i posljedicama donošenja istog.

U odnosu na navode iz Izjašnjenja koji se odnose na automobil marke BMW, tip: x70, registarske oznake: [REDACTED], a da je isto prodato, za šta je dostavljen Ugovor o komisionoj prodaji od 12.09.2014. godine, gdje se kao kupac navodi M.M. iz [REDACTED], Komisija je tim navodima poklonila vjeru. Nadalje, od olakšavajućih okolnosti, Komisija je cijenila da se radi o prvoj povredi odredaba Zakona od strane imenovanog. Imajući u vidu sve naprijed navedeno, odlučeno je da se izrekne novčana kazna obustavom dijela isplate neto mjesečne plate, odnosno naknade, koju nosilac javne funkcije prima za obavljanje javne funkcije u iznosu od 10% (deset posto) neto plate, odnosno naknade kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

#### **POUKA O PRAVNOM LIJEKU:**

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik  
Komisije za odlučivanje o sukobu interesa

---

Admira Mujić, dipl. pravnik

#### Dostavljeno:

1. A.D., Brčko distrikt BiH,
2. Internet stranici Komisije,
3. Evidenciji i
4. Arhivi.